

## Johtočála 2025-35

Dáhton: 01.07.2025  
2024-21

# Njuolggadus doarjaga birra orohagaide ja boazoservviide – kommentárat njuolggadussii

Kommentárat ja čilgehusat njuolggadussii doarjaga birra orohagaide ja boazoservviide.

## Sisdoallu

|                                                                |           |
|----------------------------------------------------------------|-----------|
| <b>Álggahus .....</b>                                          | <b>3</b>  |
| <b>Obbalašgovva rievdadusaid badjel .....</b>                  | <b>3</b>  |
| Rievdadusat boazodoallošiehtadusa 2025/2026 olis .....         | 3         |
| <b>Njuolggadusa mearrádusat .....</b>                          | <b>4</b>  |
| <b>Kapihttal 1. Obbalaš mearrádusat .....</b>                  | <b>4</b>  |
| § 1-1. Ulbmil.....                                             | 4         |
| Kommentárat mearrádussii.....                                  | 4         |
| § 1-2. Definišuvnnat.....                                      | 4         |
| Kommentárat mearrádussii.....                                  | 5         |
| § 1-3. Gáibádusat ohcamii .....                                | 5         |
| Kommentárat mearrádussii.....                                  | 5         |
| § 1-4. Raporteren ja bearráigeahčču .....                      | 6         |
| Kommentárat mearrádussii.....                                  | 6         |
| § 1-5. Boasttumáksimiid njulgen.....                           | 7         |
| Kommentárat mearrádussii.....                                  | 7         |
| § 1-6. Unnideapmi je.....                                      | 8         |
| Kommentárat mearrádussii.....                                  | 9         |
| § 1-7. Ruoktotmáksima dahje unnidanmeari sisagáibideapmi ..... | 11        |
| Kommentárat mearrádussii.....                                  | 11        |
| § 1-8. Váidinvejolašvuohta.....                                | 12        |
| Kommentárat mearrádussii.....                                  | 12        |
| § 1-9. Oktasaš mearrádusat.....                                | 12        |
| Kommentárat mearrádussii.....                                  | 12        |
| <b>Kapihttal 2. Orohatdoarjja.....</b>                         | <b>13</b> |

|                                                                             |           |
|-----------------------------------------------------------------------------|-----------|
| <b>§ 2-1. Orohatdoarjaga eavttut.....</b>                                   | <b>13</b> |
| Kommentárat mearrádussii.....                                               | 13        |
| <b>§ 2-2. Orohatdoarjaga máksomearit .....</b>                              | <b>16</b> |
| Kommentárat mearrádussii.....                                               | 17        |
| <b>§ 2-3. Orohatdoarjaga geavaheapmi.....</b>                               | <b>18</b> |
| Kommentárat mearrádussii.....                                               | 18        |
| <b>§ 2-4. Sierra doarjja Trollheimenii .....</b>                            | <b>18</b> |
| Kommentárat mearrádussii.....                                               | 18        |
| <b>§ 2-5. Ohcanáigemearri .....</b>                                         | <b>19</b> |
| Kommentárat mearrádussii.....                                               | 19        |
| <b>§ 2-6. Doaibmanjuolggadusaid ráhkadeami goluid gokčan .....</b>          | <b>19</b> |
| Kommentárat mearrádussii.....                                               | 20        |
| <b>Kapihttal 3. Gearggusvuodáfoanda .....</b>                               | <b>20</b> |
| <b>§ 3-1. Doarjja gearggusvuodáfondii .....</b>                             | <b>20</b> |
| Kommentárat mearrádussii.....                                               | 20        |
| <b>§ 3-2. Gearggusvuodáfoandda geavaheapmi .....</b>                        | <b>21</b> |
| Kommentárat mearrádussii.....                                               | 21        |
| <b>§ 3-3. Golut ja máksomearit.....</b>                                     | <b>21</b> |
| Kommentárat mearrádussii.....                                               | 22        |
| <b>§ 3-4. Máhcahangáibádus boasttogeavaheami olis .....</b>                 | <b>22</b> |
| Kommentárat mearrádussii.....                                               | 22        |
| <b>Kapihttal 4. Erenoamáš doarjja gearggusvuhtii .....</b>                  | <b>22</b> |
| <b>§ 4-1. Doarjjaeavttut .....</b>                                          | <b>22</b> |
| Kommentárat mearrádussii.....                                               | 23        |
| <b>§ 4-2. Doarjjameroštallan .....</b>                                      | <b>23</b> |
| Kommentárat mearrádussii.....                                               | 23        |
| <b>§ 4-3. Doarjja johtit bohccuiguin dálveorohagas geasseorohakkii.....</b> | <b>24</b> |
| Kommentárat mearrádussii.....                                               | 24        |
| <b>§ 4-4. ležasoassi go fievrreda fuođđariid helikopteriin .....</b>        | <b>25</b> |
| Kommentárat mearrádussii.....                                               | 25        |
| <b>Kapihttal 5. Fápmuiboahтин .....</b>                                     | <b>25</b> |
| <b>§ 5-1. Fápmuiboahтин.....</b>                                            | <b>25</b> |
| Kommentárat mearrádussii.....                                               | 25        |

## Álggahus

### Obbalašgovva rievdadusaid badjel

#### Rievdadusat boazodoallošiehtadusa 2025/2026 olis

##### § 2-1. Orohatdoarjaga eavttut

##### § 2-2. Orohatdoarjaga máksomearit

- Orohat 17 nammii lea vuodđosubmi gitta 385 500 ruvnno rádjái
- 
- Orohagaid 30A, 30B ja 30C nammii lea vuodđosubmi gitta 457 000 ruvnno
- Orohat 17 nammii lea vuodđosubmi gitta 385 000 ruvnno rádjái
- Orohat 16 nammii lea vuodđosubmi gitta 457 000 ruvnno rádjái
- Orohagaid 30A, 30B ja 30C namaide lea vuodđosubmi gitta 457 000 ruvnno rádjái
- Femund orohaga nammii lea vuodđosubmi gitta 457 000 ruvnno rádjái
- Boazoservviid nammii lea vuodđosubmi gitta 457 000 ruvnno rádjái

##### § 3-1. Doarjja gearggusvuodafondii

Doarjja gearggusvuodafondii rievdaduvvo nu ahte dal máksojuvvo 45 ruvnno juohke bohcco nammii, boazologu mielde mii lei njukčamánu 31. beaivvi mii lea mearriduvvon boazologu mielde. Doarjja máksojuvvo jahkásaččat dassážii gearggusvuodafondii lea dan máđe stuoris ahte sáhtá gierdat guohtunroasu mii bistá 90 jándora.

##### § 4-1. Doarjjaeavttut

Eaktu lea rievdan bustávva b mielde ahte ferte unnimusat 30 beaivvi mannán dan rájes go gearggusvuodálávdegoddi lea cealkán ahte lea guohtunroassu orohagas dahje boazosearvvis ovdal go sáhtá ohat doarjaga dasa. Eaktu ahte gearggusvuodafondii ferte leat guoros ovdal ohcá lea váldojuvvon eret.

##### § 4-2. Doarjjameroštallan

Maŋemus lađas lea sihkkojuvvon nu ahte ruhta mii lea báhcán gearggusvuodafondii ii gessojuvvo eret juolluduvvon heahtegearggusvuodafondii.

## Njuolggadusa mearrádusat

### Kapihttal 1. Obbalaš mearrádusat

#### § 1-1. Ulbmil

Doarjja orohagaide ja boazoservviide galgá leat veahkkin dáidda addimis eambbo mieldeovddasvástádusa boazodoalu ovdánahttimis guoddinnávccalaš boazodoallun, háhkat dássivuođa boazologu ja guohtumiid gaskka, sihkkarastit guohtuneatnamiid ja buoridit gánnáhahttivuođa.

Juolludeami ja roassogearggusvuoda doarjaga ulbmil lea láhčit diliid dárbbášlaš doaibmabijuide orohagain ja boazoservviid go leat roasut guohtuma dáfus.

Erenoamáš doarjja gearggusvuhtii galgá eastadit stuora boazovahágiid dahje eará stuora elliidčálgohástalusaid guohtunroasuid oktavuodas, go orohaga dahje boazosearvvi iežas gearggusvuodafoanda ii leat doarvái gokčat dárbbášlaš doaibmabijuid.

**Gáldu:** [Forskrift om tilskudd til reinbeitedistrikter og reinlag](#) (Lovdata)

#### Kommentárat mearrádussii

##### **Vuosttaš lađas**

Ulbmil orohatdoarjagiin ja doarjagiin boazoservviide lea ovdánahttit boazodoalu dakkár vugiin mii oktiivástida boazodoallopolitihkalaš ulbmiliiguin ja ekonomalaš gaskaomiin. Doarjjanjuolggadusa ortnegat galget movttiidahttit ealáhusa ja eará aktevrraid doalahit boazodoallolága gáibádusaid ja olahit bajit mihtuid. Dihto mearrádusaid geavahus doarjjanjuolggadusas galgá dan dihte geahččat boazodoallolága § 1 oktavuodas.

##### **Nubbi lađas: Ulbmil ruđa várremis gearggusvuhtii**

Eai leat kommentárat.

##### **Goalmmát lađas: ulbmil liigedoarjaga várremis**

Eai leat kommentárat.

#### § 1-2. Definišuvnnat

Orohatdoarjja dán oktavuodas mearkkaša doarjja orohagaid ja boazoservviid hálddašeapmái, plánemii ja resursahálddašeapmái.

Ealátroassu mearkkaša dáhpus mii spiehkasta normálas ja gáidá čielgasit dábálaš doallovariašuvnnas mii lea jagis jahkái. Ealátroassu sáhtá bohciidit jođánit, šaddat áiggi badjel, ja lea ráddjejuvvon sihke geográfalaččat ja das galli boazoeaiggádii čuohcá. Go lea roassu, de lea mihtilmas oassi guohtuneatnamis lássejuvvon dahje leat eará klimáhtalaš váikkuhusat mat áitet bohcco birgenlági, ja lea mearkkašahtti várra massit bohccuid ja gillát stuora ekonomalaš vahágiid. Roassu sáhtá áitit daid boazoeaiggádiid viidáset doalu geaidda roassu čuohcá.

**Gáldu:** [Forskrift om tilskudd til reinbeitedistrikter og reinlag](#) (Lovdata)

## Kommentárat mearrádussii

Orohatdoarjaga njuolggadusat leat 2. kapihttalis.

### Ealátroasu definišuvdna

Ealátroassu mearkkaša dáhpáhus mii spiehkasta normálas ja gáidá čielgasit dábálaš doallovariašuvnnas mii lea jagis jahkái. Dábálaš doallovariašuvnnat jagis jahkái, rievddadallá guovllus guvlui.

Stuorit oassi siida guohtunareálas galgá leat lássejuvvon dahje eará klimáhtalaš oktavuodain váikkuhuvvon mat áitet bohccuid birgejumi. Sátnádeapmi «váikkuhusat eará klimáhtalaš oktavuodain mat áitet bohccuid birgejumi» čujuha dakkár dilálašvuodaide go guohtuneatnamat leat rahpasat, muhto eará ákkaid dihte áitá bohccuid birgejumi. Dat sáhtá ovdamearkka dihte leat goikkadat mii dagaha ahte boazu ii gávnna čázi.

Lássejuvvon guohtuneatnamiid oktavuodas, ovdamearkka dihte dalle go lea nu ollu muohta ahte boazu ii gávnna biepmu, de eai leat guohtuneatnamat olámuttus. Jus guohtuneatnamat leat gurbon dan dihte go iežas dahje eará olbmuid ealut leat guhton badjelmeari, dahje guohtunguorbama dihte, de eavttut eai ollašuva.

Stuorit oassi siidda guohtunareálas sáhtá molsašuddat guovllus guvlui. Árvvoštallamis berre deattuhit masá iešguđetge oassi guohtunguovllus geavahuvvo. Guovllut mat leat dehálaččat boazodoalu ovdánahttimii, dego guottetbáikkid dahje jahkodatguohtumat, sáhttet leat dehálaš oasit siidda guohtunareálain. Dábálaččat eai fátmastuvvo johtingeainnut dan dihte go bohccot leat johtingeainnus oanehis áiggis.

Loahpas lea eaktun ahte galgá leat duohta várra ahte sáhtá massit bohccuid ja ahte sáhtá šaddat stuorra ekonomalaš vahágin.

Buot eavttut galget leat ollašuvvan jus gearggusvuodálávdegoddi galgá sáhttit cealkit ahte lea guohtunroassu.

## § 1-3. Gáibádusat ohcamii

Doarjja orohagaide ja boazoservviide galgá ohccojuvvot sierra skoviin man Eanandoallodirektoráhta lea mearridan. Ohcan sáddejuvvon dan fylkka stáhtahálddašeaddjái gosa orohat dahje boazosearvi gullá. Stáhtahálddašeaddji mearrida doarjjaohcama. Ohcamat galget gieđahallojuvvot daid njuolggadusaid mielde mat gustojedje dan boazodoallojagis masa ohcá doarjaga.

**Gáldu:** [Forskrift om tilskudd til reinbeitedistrikter og reinlag](#) (Lovdata)

## Kommentárat mearrádussii

Stáhtahálddašeaddji meannuda ohcamušaid vuosttas instánssas. Eanandoallodirektoráhtta lea váidininstánša, vrd. hálddašanlága § 28 vuosttaš lađas ja njuolggadusa § 1-8.

Go ohcá doarjaga, de leat njuolggadusat boazodoallojagis man ovddas ohcá doarjaga mat gustojit, beroškeahhtá goas ohcamuš sáddejuvvon. Jus dahkko áššemearrádus marjnel go ođđa njuolggadus lea doaibmagohtán, de geavahuvvojit njuolggadusat dan dihto boazodoallojagi ovddas ohcamušaid

meannudeamis. Ovdamearkka dihte: Ohcamušat mat sáddejuvvojit ovdal suoidnemánu 15. beaivvi 2024 meannuduvvojit njuolggadusaid 2023/2024 vuodul.

## § 1-4. Raporteren ja bearráigeahčču

Dat geat ožžot doarjaga dán njuolggadusa mielde, leat geatnegasat addit buot dieđuid maid boazodoalloeiseválddit atnet dárbbaslažžan vai sáhttet hálldašit doarjjaortnegiid, dahje vai sáhttet ollašuhttit boazodoallošiehtadusa.

Doarjjaoažžu galgá raporteret doarjaga geavaheami birra maŋemus doaibmajagis stáhtahálldašeaddjái ovdal suoidnemánu 15. beaivvi. Váilevaš raporteren das movt doarjja lea geavahuvvon, sáhtta dagahit ahte máksojuvvon doarjja ollásii dahje belohakkii gáibiduvvo máksojuvvot ruovttoluotta.

Boazodoalloeiseválddit bearráigeahččet ahte doarjjamáksimat leat riektá, ja das lea vuoigatvuohta oaidnit buot rehketoaluid, reivvestallamiid ja čállamušaid mat gusket doarjagii. Sáhtta gáibiduvvot ahte revisor duođašta dieđuid.

**Gáldu:** [Forskrift om tilskudd til reinbeitedistrikter og reinlag](#) (Lovdata)

## Kommentárat mearrádussii

### Vuosttaš lađas: Doarjjavuostáiváldiin lea dieđihangeatnegasvuohta

§ 1-4 vuosttaš lađđasa mielde lea doarjjavuostáiváldis dan njuolggadusa mielde dieđihangeatnegasvuohta boazodoalloeiseválddiide. Boazodoalloeiseválddiin oaivvilduvvo stáhtahálldašeaddji, Eanandoallodirektoráhtta ja Eanandoallo- ja biebmodepartemeantta.

Mearrádusa galgá ipmirdit nu ahte boazodoalloeiseválddit sáhttet dušše gáibidit dieđuid mat leat áššáiguoskevaččat meannudeami ja orohagaid ja boazoservviid doarjjaortnega obbalaš hálldašeami oktavuodas.

Doarjjavuostáiváldi gii gohčohallá addit dieđuid sáhtta váldit gohččuma jus oaivvilda ahte gohččumis ii leat doarvái riektivuoddu gáibidit dieđuid. Váidaga sáhtta ovdanbuktít čálalaččat dahje njálmmálaččat, ja ovdal go lea gollán golbma beaivvi dan rájes go oaččui gohččuma.

### Nubbi lađas: Váilevaš raporterema váikkusat

Njuolggadusas gáibiduvvo ahte orohagat ja boazosearvvit raporterejit sierra raporterenkovis mo orohatdoarjja lea geavahuvvon, ja ahte orohagat čájehit rehketoalloodárkkistuvvon jahkerehketoalvu vássán jagi ovddas. Rehketdoalloodárkkistuvvon rehketdoalu gáibádus boazoservviide gusto dušše dalle go boazosearvi lea geatnegahtton revišuvdnii lága 2020-11-20-128 vuodul revišuvnna ja rehketdoalliid birra.

Dárkkuhuvvo ahte raporteregeatnegasvuohta doarjaga geavahusa birra maŋemus boazodoallojagi ovddas gusto maŋemus boazodoallojahkái. Leat dušše orohagat mat leat ožžon doarjaga njuolggadusa mielde maŋemus boazodoallojagis mat fertejit raporteret doarjaga geavaheami birra. Orohagat/boazosearvvit geat eai leat deavdán eavttuid orohatdoarjagii § 2-1 mielde, eai leat geatnegahtton raporteret doarjaga geavaheami vássán jagi ovddas go sii eai leat ožžon doarjaga.

Raporteren sierra raporterenskoviin Eanandoallodirektoráhttii sihkkarastá ahte doarjaga geavaheapmi boahká oidnosii, nu lea vejolaš árvvoštallat ahte doarjja lea geavahuvvon dakkár vugiin mii oktiivástida njuolggadusain.

Jus raporteren váilu, de ii sáhte duodaštit ahte doarjja lea geavahuvvon dakkár vugiin mii oktiivástida áššemearrádusain/eavttuin njuolggadusas, ja doarjja sáhtá dan dihte gáibiduvvot ruovttoluotta máksojuvvot. Geahča § 1-5 kommentáraid.

### **Goalmát lađas: Boazodoalloeiseváldit bearráigeahččet doarjjamáksámušaid**

§ 1-4 goalmát lađđasa mielde sáhttet boazodoalloeiseválddit bearráigeahččet ahte doarjjamáksámušat leat riehta. § 1-11 nuppi lađđasa vuodul Stáda ekonomijastivrema njuolggadusain galget boazodoalloeiseválddit bearráigeahččet.

Bearráigeahčču mearkkaša ahte boazodoalloeiseválddiin lea vejolašvuhta oaidnit buot rehketoalu, duodaštusaid ja gulahallama mii lea relevantta doarjjamáksima oktavuodas. Ovdal go dakkár dárkkisteapmi sáhtá čađahuvvot, de galget eiseválddit buktit ovdan dieđuid, ja muitalit láhkavuodu ja váidinvejolašvuoda birra, nu go lea čilgejuvvon § 1-4 vuosttaš lađđasis.

## **§ 1-5. Boasttumáksimiid njulgen**

Boazodoalloeiseválddit sáhttet njulget boasttuvuođaid máksojuvvon doarjagiin, juogo mañjelmáksimiid bokte dahje doarjaga ruoktotmáksingáibádusa bokte doarjjaoažžus.

**Gáldu:** [Forskrift om tilskudd til reinbeitedistrikter og reinlag](#) (Lovdata)

### **Kommentárat mearrádussii**

Mearrádus § 1-5 dahká vejolažžan ahte boazodoalloeiseválddit (stáhtahálddašeaddji, Eanandoallodirektoráhtta ja Eanandoallo- ja biebmodepartemeantta) sáhttet divvut boasttumáksojuvvon doarjaga, juogo dan bokte ahte mañjel máksit doarjaga doarjjavuostáiváldái dahje gáibidit doarjjavuostáiváldis máksit ruovttoluotta doarjaga. Ruovttoluottamáksima birra áššemearrádus sáhtá geavvat dušše dalle jus lea dahkkon áššemearrádus unnideapmi birra njuolggadusa § 1-6 mielde, dahje ahte doarjaga birra áššemearrádus rievdaduvvo go čájehuvvo ahte ohcci ii deavdán eavttuid oažžut doarjaga ohcanáigemuttus.

### **Mañjel máksit doarjaga doarjjavuostáiváldái**

Eanandoallodirektoráhtta sáhtá mañjel máksit differánssa máksojuvvon doarjagis ja vuoigaduvvon doarjagis doarjjavuostáiváldái, doarjjavuostáiváldi kontonummárii, mañjel go boasttuvuohta fuomášuvvui. Ii dárbbas dahkkot áššemearrádus máksima birra, muhto doarjjavuostáiváldi galgá oažžut čálalaš dieđu doarjaga mañjel-máksima birra.

Dakkár oktavuodain go doarjjavuostáiváldi dahje boazodoalloeiseválddit fuomášit ahte doarjjavuostáiváldi lea ožžon beare unnán doarjaga, de lea váldonjuolggadus ahte boazodoalloeiseválddit mákset olles differánssa doarjjavuostáiváldái.

## Ruoktotmáksingáibádus

### Makkár oktavuođain gusto mearrádus?

Mearrádus § 1-5 gusto dakkár oktavuođain go doarjjavuostáiváldái lea máksojuvvon beare ollu doarjja. Sátnádeami mielde gusto § 1-4 buot oktavuođain go doarjja lea boastut máksojuvvon, maiddá dalle go boasttumáksin ii lean doarjjavuostáiváldi ovddasvástádus.

### Váldonjuolggadus lea ruoktotmáksin

Boazodoalloeiseválddiin lea ovddasvástádus ahte stáda ruhta geavahuvvo nu ahte oktiivástida lágaiguin ja njuolggadusaiguin, dása gullelaš boazodoallošiehtadus ja dat njuolggadus. Váldonjuolggadus lea dan dihte ahte boazodoalloeiseválddit galget gáibidit ruovttoluotta máksit jus lea boastut máksojuvvon doarjja.

Dat ahte boazodoalloeiseválddit «sáhttet» divvut boasttumáksimiid dan bokte ahte gáibidit ruovttoluotta máksit doarjaga, mearkkaša ahte eiseválddit fertejit dahkat konkrehtalaš árvvoštallama das ahte lea go govttolaš gáibidit supmi ruovttoluotta dan dihto áššis. Boazodoalloeiseválddit fertejit árvvoštallat ahte galget go gáibidit ruovttoluottamáksima ja man olu galget gáibidit ruovttoluotta máksit.

### Áššemeannudeapmi áššiin main lea ruoktotmáksin

Dakkár oktavuođain go boazodoalloeiseválddit leat mearridan ahte máksojuvvon doarjja galgá gáibiduvvot ruovttoluotta máksojuvvot, de galget eiseválddit rievdadit álgoálgosaš áššemearrádusa doarjaga birra hálddašanlága § 35 vuodul, jus eavttut rievdadit leat ollašuvvan dihto áššis.

Doarjjaáššemearrádusa rievdadeapmi, ja mii dagaha gáibádusa máksit ruovttoluotta, rehkenastojuvvo rievdadussan mii váikkuha hejot sutnje geasa áššemearrádus guoská. Jus boasttuvuohta fuomášuvvo mannel go doarjjavuostáiváldi lea ožžon áššemearrádusa, de lea dábálaččat rievdadus mii váikkuha hejot doarjjavuostáiváldái dan duohken ahte áššemearrádus lea eahpegustojeaddji, vrd. hálddašanlága § 35 vuosttaš lađas bustávva c.

Dakkár áššiin go lea máksojuvvon beare ollu doarjja boasttuvuođa dihte, de lea dábálaččat boasttuvuohta leamaš dakkár mii mearrida áššemearrádusa sisdoalu. Danin galgá árvvoštallat konkrehtalaččat ja vuodđudit árvvoštallama buot oktavuođaide áššis lágahis eahpegustojumi oahpa vuodul, ahte leago áššemearrádus eahpegustojeaddji.

## § 1-6. Unnideapmi je.

Jus doarjjaoažžu fuomáškeahtá dahje eaktodáhtolaččat lea addán boasttu dahje váilelaš dieđuid ohcamis mii lea biddjon vuodđun dahje mii livččii sáhtán biddjot vuodđun doarjaga vuoiggameahtun máksimii, de sáhtá doarjja ollásit dahje belohahkii dollejuvvot.

Jus doarjjaoažžu boazodoalloeiseválddiid mearrádusa vuodul doaibmá dahje lea doaibman nu ahte rihkku lágaid dahje boazodoalloealáhusa njuolggadusaid, ja lea fuollameahttumit dahje eaktodáhtolaččat dan dahkan, de sáhtá doarjja ollásit dahje belohahkii dollejuvvot dassáži go dilit leat njulgejuvvon. Jus dakkár njuolggadusaid rihkkumis lea leamaš roavva fuollameahttunvuotta dahje eaktodáhtolašvuotta, de sáhtá doarjja ollásit dahje belohahkii dollejuvvot.

Jus Femunden orohat ii čuoovo boazodoalu eavttuid orohaga rájiid siskkobealde, de galgá doarjja ollásit dahje belohahkii dollejuvvot.

**Gáldu:** [Forskrift om tilskudd til reinbeitedistrikter og reinlag](#) (Lovdata)

## **Kommentárat mearrádussii**

### **Mii lea unnideapmi ja mii dan ulbmil lea?**

Mearrádus § 1-6 ásaha doarjaga unnideami. Unnideapmi mearkkaša ahte stáhtahálddašeaddji unnida juolluduvvon doarjagis, vaikko doarjjavuostáiváldi devddii eavttuid doarjagii.

Bajit mihttu unnidemiin lea sihkkarastit dohkálaš hálldašeami searvevuoda ruđain.

### **Boazodoalloeiseválddit «sáhttet» unnidit doarjaga, muhto galget álo árvvoštallat unnideami**

Jus doarjjaohcamuša oktavuodas dahje jus § 1-6 vuosttaš dahje nubbi lađas fátmasta doarjjavuostáiváldi, de «sáhtta» doarjja unniduvvot. Dat mearkkaša ahte hálldahus dahká friija árvvoštallama das ahte galgá go doarjja unniduvvot.

### **Vuosttaš lađas: Avkortning ved feilopplysninger**

§ 1-6 vuosttaš lađđasa mielde sáhtta doarjja unniduvvot jus doarjjavuostáiváldi lea fuollameahttumit dahje eaktodáhtolaččat addán váilevaš- dahje boasttudieđuid ohcamušas, ja dat dieđut leat dahje livčče sáhttan dahkat vuodu doarjaga boasttumáksimii.

### **Ohcci galgá addán «váilevaš- dahje boasttudieđuid ohcamušas mat leat dahje livčče sáhttan dahkat vuodu doarjaga boasttumáksimii»**

Boasttudiehtu lea go dieđut ohcamušas eai oktiivástit duohta diliin. Váldonjuolggadus lea ahte ohcci ferte deavdit rievtties dieđuid rievtties ruvttu sisa ohcamušas jus doarjja galgá leat vuoigaduvvon sutnje. Váldonjuolggadus lea ahte ohcci galgá deavdit rievtties dieđuid rievtties sadjái ohcamis jus doarjja galgá leat vuoigaduvvon sutnje.

### **Ohcci galgá «fuollameahttumit dahje eaktodáhtolaččat» láhtten**

Boahte eaktu lea jus ohcci lea addán boasttudieđu «fuollameahttumit dahje eaktodáhtolaččat». Dat mearkkaša ahte boazodoalloeiseválddit eai sáhte unnidit doarjaga jus ohcci lei várrogas buori jáhkus go attii boasttudieđu. Doarjjavuostáiváldi lea várrogas buori jáhkus go son ii diehtán, ja ii livčče galgan diehtit, ahte diehtu ohcamušas lei boastut.

### **Fuollameahtunvuolta**

Mearrádus § 1-6 vuosttaš lađas fátmasta earkilis fuollameahtunvuoda. Earkilis fuollameahtunvuolta lea dalle go doarjjavuostáiváldi lea láhtten dakkár vugiin mii spiehkasta das mo dábálaš várrogas olmmoš seamma dilis livčče láhtten.

### **Eaktodáhtolašvuolta**

Doarjjavuostáiváldi gii lea iešmielaid addán boasttudieđuid vai sutnje juolluduvvo doarjja lea eaktodáhtolaččat dahkan dan. Das oaivvilduvvo ahte doarjjavuostáiváldi diđii dahje livčče galgan diehtit ahte dieđut ledje boastut, muhto liikka mearridii bidjat daid ohcamuššii ja oazžut doarjaga mii ii lean vuoigaduvvon sutnje.

### **Unnidansubmi**

Stáhtahálddašeaddji sáhtta unnidit «olles dahje oasi doarjagis». Váldonjuolggadus lea ahte doarjja unniduvvo supmiin mii vástida boasttumáksimii. Ovdamearkka dihte, jus boasttudiehtu dagahii ahte doarjjavuostáiváldi oaččui 10 000 eahpevuoigaduvvon doarjaga, de galgá doarjjasubmi unniduvvot

10 000 ruvnnuin.

Unnidansubmi ii sáhte goasse leat eambbo go dan maid ohcci oaččui go ozai doarjaga dan dihto áigodagas. Das oaivvilduvvo ahte unnidansubmi ii sáhte leat eambbo go doarjjamáksámuš, nu ahte doarjjavuostáiváldi šaddá vealgugas boazodoalloeiseválddiide eanet go doarjjasubmi man lei ohcan.

### **Nubbi lađas:**

#### **Vuosttaš čuokkis: Vuosttaš čuokkis: Doarjaga dollen njuolggadusrihkuma oktavuodas**

Mearrádus § 1-6 nuppi lađđasis vuosttaš čuoggás gusto dalle go doarjjavuostáiváldi rihkku boazodoalu lágaid dahje njuolggadusaid. Dakkár oktavuodain go doarjjavuostáiváldi lea láhtten fuollameahttumit dahje eaktodáhtolaččat, de sáhtta stáhtahálddašeaddji dollet doarjaga dassáži lobihis doaibma lea njulgejuvvon.

#### **Eaktu boazodoalu láhka- dahje njuolggadus rihkkuma birra**

Boazodoalu lágat ja njuolggadusat galget leat rihkkojuvvon. Boazodoallolága lassin, oktan gullevaš njuolggadusain ja boazodoallošiehtadusa njuolggadusain, de sáhttet dakkár njuolggadusat leat ovdamearkka dihte ellidčalgoláhka gullevaš njuolggadusaiguin.

Dan ahte galgá rihkkon lágaid ja njuolggadusaid mearkkaša ahte rihkkuma oktavuodas galgá leat dahkkon áššemearrádus mas čielggaduvvo doarjjavuostáiváldi rihkkun. Hálddašanlága vuolggasadji lea ahte áššemearrádus galgá biddjot johtui dakkaviđe, ja mearkkaša ahte lobihis doaibma § 1-6 nuppi lađđasa mielde bistá, vaikko áššemearrádus lea váidojuvvon, jus áššemearrádusa johtuvidjan ii leat mañiduvvon hálddašanlága § 42 mielde.

#### **Dollenvuoigatvuohta ii leat šat gustovaš go ohcci lea njulgen doaimmas**

Jus ohcci lea njulgen doaimmas ja dagahan ahte su boazodoallu lea lobálaš, de stáhtahálddašeaddji ii sáhte šat doallat doarjaga. Das oaivvilduvvo ahte eiseválddiid gohččun njulget lobihis diliid ohcanáigemeari áiggis, ii sáhte leat vuodđun doallat doarjaga.

Doarjjavuostáiváldis dat leat ovddasvástádus duođaštit ahte lobihis doaibma lea njulgejuvvon. Dat mearkkaša ahte doarjjavuostáiváldi galgá háhkat dieđuid ja duođaštusaid mat leat dárbbaslaččat duohtan dahkat ahte lobihis doaibma lea njulgejuvvon. Doarjjavuostáiváldi sáhtta ovdamearkka dihte sáddet áššemearrádusa ahte su boazodoallu lea šaddan lobálažžan.

#### **Doarjaga unnideapmi njuolggadusrihkuma oktavuodas**

§ 1-6 nuppi lađđasa nuppi čuoggá mielde sáhtta stáhtahálddašeaddji unnidit olles dahje oasi doarjagis jus doarjjavuostáiváldi lea doaimmahan boazodoalus dakkár vugiin mii rihkku boazodoalloealáhusa lágaid ja njuolggadusaid, ja doarjjavuostáiváldi lea láhtten hui fuollameahttumit dahje eaktodáhtolaččat.

#### **Duođalaš fuollameahtunvuođa ja eaktodáhtolasvuođa birra**

Duođalaš fuollameahtunvuohta lea erenoamáš spiehkastat das mo dábalaš várrogas olmmoš seamma virggis ja dilis livčče dábalaččat láhtten. Dat árvoštallojuvvon objektiivvalaččat. Árvoštallan lea seamma go earjilis fuollameahtunvuođas, muhto go duođalaččat lea fuollameahttumit láhtten, de fertejit doarjjavuostáiváldi dagut vuolggahit garra moaitámuša.

#### **Goalmát lađas: Unnideapmi Femunda eavttu rihkkuma oktavuodas**

Mearrádusa goalmát lađđasis lea sierra mearrádus Fæmund sijte orohaga váste, mii lea oktasaš

dálveorohat Saanti sijte ja Gåebrie sijte orohagain. Mearrádus addá boazodoalloeiseválddiide geatnegasvuoda unnidit doarjaga jus eavttut doallat boazodoalu orohaga rájiid siste ii dollojuvvo, vrd. sáni «galgá». Friija hálddašanárvoštallan dan mearrádusas lea dan dihte gáržžiduvvon dasa ahte man stuora oassi doarjagis galgá unniduvvot.

Eanandoallo- ja biebmodepartemeantta lea cealkán mearkkašupmereivves njuolggadusrievdadusaide 2014: «Da lea sierramearrádus mii guoská Fæmund sijte orohahkii, geahča boazodoallošiehtadusa ču. 4.1. Boazodoalloeiseválddit galget unnidit Fæmund sijte orohaga doarjaga jus orohat ii doahhtal eavttuide doalahit boazodoalu orohaga rájiid siskkobeaide, das maidái eavttuid mat leat stáda ja duopmoguovllu eanaeaiggádiid gaskasaš šiehtadusas mearriduvvon Alimusrievttis Korssjøfjell-áššis, Rt. 1988 s. 1217. Ii gáibiduvvo sivalašvuhta, lea doarvái ahte lea celkojuvvon ahte orohat lea rihkkon guovllu geavaheami eavttuid ovdalgo unnideapmi galgá dahkkot. Mo unnideapmi galgá dahkkot lea stáhtahálddašeaddji duohken. Unnimusmearri lea dattege gokčat buhtadusgáibádusaid daid šiehtadusaid vuodul mat leat dahkkojuvvon Korssjøfjell eanaeaiggádiiguin.»

## § 1-7. Ruoktotmáksima dahje unnidanmeari sisagáibideapmi

Erohus máksojuvvon doarjagis ja dohkkehuvvon doarjagis mii lea mearriduvvon ruoktotmáksima § 1-4 mielde dahje unnideami § 1-6 mielde, sáhtá gáibiduvvot máksojuvot ruoktot doarjjaoažžus dahje rehkenastojuvvot oassin boahttevaš doarjjamáksámušain.

Boazodoalloeiseválddiid gáibádusat sáhttet rehkenastojuvvot oassin doarjjaoažžu doarjjamáksámušain.

Jus fitnodat/doarjjaoažžu ii lean fuolalaš buori jáhkus máksámuša dáfus, de sáhttet gáibiduvvot reanttut dan rájes go ruoktotmáksingáibádus lea ollen fitnodahkii/doarjjaoažžui. Jus lea leamaš roavva fuollameahttunvuhta dahje eaktodáhtolašvuhta, de sáhttet reanttut gáibiduvvot dan rájes go vuoiggameahttun doarjja lea máksojuvvon. Reantojuolgi biddjo dan reantojuolggi mielde maid Finánsadepartemeanta áigges áigái mearrida § 3 vuodul lágas b. juovlamánu 17. b. 1976 nr. 100 reanttuid birra maŋŋonan máksimiid olis j.e.

Gáldu: [Forskrift om tilskudd til reinbeitedistrikter og reinlag](#) (Lovdata)

## Kommentárat mearrádussii

### Vuosttaš lađas: Differánssa sisagáibideapmi

Mearrádus § 1-7 fátmasta njuolggadusaid differánssa gáibideamis gaskal máksojuvvon doarjaga ja supmi mii gáibiduvvo ruovttoluotta máksojuvot áššemearrádusa unnideami ja ruovttoluottamáksima birra. Boazodoalloeiseválddit galget, ovdal go gáibidit ruovttoluottamáksima, rievdadit áššemearrádusa doarjaga birra hálddašanlága § 35 mielde.

### Nubbi lađas: Nubbi lađas: Eret-rehkenastima birra

§ 1-7 nuppi lađđasis lea iešheanalaš láhkavuoddu rehkenastit eret vealgugas supmi boahttevaš doarjjamáksámušain.

### Goalmmát lađas: Reanttut

Vuolggasadji Norgga riektevuogádagas lea ahte reanttut eai sáhte gáibiduvvot láhkavuodu haga. Dat mearkkaša ahte dihto njuolggadusas galgá leat mearrádus reanttuid birra jus daid galgá sáhttit gáibidit ruovttoluottamáksima oktavuodas.

§ 1-7 goalmmát lađđasis lea rahppon vejolašvuohta ahte reanttut sáhttet gáibiduvvot ruovttoluottamáksima oktavuodas. Reanttut mearriduvvojit guovtti iešguđetge áigemuttu mielde:

- vuostáiváldiide geat eai lean várrogasat buori jáhkus máksámuša oktavuodas – dan rájes go ruovttoluottamáksingáibádus bođii vuostáiváldái
- vuostáiváldiide geat leat láhtten hui fuollameahttumit dahje eaktodáhtolaččat – dan rájes go eahpevuogaduvvon doarjja máksojuvvui.

Goappaš čuoggáid oktavuodas lea reantojuolgi seamma go dat mii lea mearriduvvon reanttuid birra maŋŋonan máksima oktavuodas § 3.

Eaktu ahte doarjjavuostáiváldi lea láhtten fuollameahttumit dahje eaktodáhtolaččat ii mearkkaš ahte reanttut eai sáhte gáibiduvvot jus doarjjavuostáiváldi lei várrogas buori jáhkus.

## § 1-8. Váidinvejolašvuohta

Stáhtahálddašeaddji mearrádusa dán njuolggadusa mielde sáhtta váidit Eanandoallodirektoráhtii hálddašanlága njuolggadusaid mielde.

Gáldu: [Forskrift om tilskudd til reinbeitedistrikter og reinlag](#) (Lovdata)

### Kommentárat mearrádussii

Eai leat kommentárat.

## § 1-9. Oktasaš mearrádusat

1. kapihttala mearrádusat gustojit buot doarjjaortnegiidda dán njuolggadusa mielde, jus eará ii leat sierra mearriduvvon.

Gáldu: [Forskrift om tilskudd til reinbeitedistrikter og reinlag](#) (Lovdata)

### Kommentárat mearrádussii

Doarjjaortnegat leat dan njuolggadusa mielde orohatdoarjja (kapihttal 2), doarjja gearggusvuodafondii (kapihttal 3) ja sierradoarjja roassogearggusvuhtii (kapihttal 4). Sierradoarjja roassogearggusvuhtii lei ovdal sierra njuolggadus, muhto lea dal váldon mielde orohagaid ja boazoservviid doarjjanjuolggadusaide sierra kapihttalin, gustovaš juovlamánu 21. beaivvi 2022 rájes.

## Kapihttal 2. Orohatdoarjja

### § 2-1. Orohatdoarjaga eavttut

Doarjja sáhtta juolluduvvot orohagaide ja boazoservviide dán kapihttala mielde jus:

- orohat ja boazosearvi lea doaimmas
- orohat lea mearridan orohatplána, mii lea ođasmahttojuvvon maŋemus njealji jagis, ja lea sádden dan stáhtahálddašeaddjái,
- boazosearvi lea mearridan boazodoalloplána ja lea sádden dán stáhtahálddašeaddjái,
- stáhtahálddašeaddji leat ožžon ovddit jagi revisordohkkehuvvon rehketdoalu,
- orohat ja boazosearvi, mat leat ožžon doarjaga dán njuolggadusa mielde maŋemus doaibmajagis, leat raportereren ruđaid várrema ja geavaheami j.e. birra sierra raporterenskovis man Eanandoallodirektoráhta lea mearridan
- orohat/boazosearvi lea mearridan gearggusvuodaplána,

Sierra oktavuodain sáhtta Eanandoallodirektoráhtta dispenseret bustávva e eavttus.

**Gáldu:** [Forskrift om tilskudd til reinbeitedistrikter og reinlag](#) (Lovdata)

### Kommentárat mearrádussii

Mearrádusas leat guhtta eavttu mat galget leat ollašuvvan jus orohat/boazosearvi galgá leat vuoigaduvvon doarjagii. Gáibádusat galget leat devdojuvvon dalle go ohcá. Dakkár oktavuodain go stáhtahálddašeaddji lea spiehkastan ohcanáigemearis § 2-5 nuppi lađđasa mielde, de galget eavttut leat ollašuvvan spiehkastanmearrádusa áigemeari siskkobealde.

Eavttut gustojit orohagaide ja/dahje boazoservviide mat ohcet doarjaga.

Boazoservviin lea boazodoallu olggobealde sámi boazoguohtunguovlluid, geahča boazodoallolága § 8 ja 9. Boazoservviide eai gusto seamma gáibádusat go orohagaide boazodoallolágas. Boazosearvit leat ásahuvvon oasusservviide, OVS (ovddasvástideaddji searvit) ja OVF (ovddasvástideaddji fitnodagaide oktasáš ovddasvástádusain) boanddain/eanaeaiggádiin ja earáin geat doaimmahit boazodoalu searvevuodas, ja sis ferte leat doaibmalohpi doaimmahit boazodoalu, geahča boazodoallolága § 8. Boazosearvit gullet hálddašeami oktavuodas Trøndelága stáhtahálddašeaddji vuollái.

### Bustávva a: Orohat/boazosearvi lea “doaimmas”

#### Orohagaide

Eaktu ahte orohat lea «doaimmas» galgá čadnojuvvot orohagaid gáibádusaide boazodoallolágas kapihttaliin 6 ja 7.

Orohagat oidnojuvvojit «doaimmas» go eavttut leat ollašuvvan.

#### Boazoservviide

Eaktu ahte boazosearvi galgá leat «doaimmas» mearkkaša ahte Trøndelága stáhtahálddašeaddji galgá ožžon jahkedieđáhusa ja bušehta maŋemus boazodoallojagi ovddas. Stáhtahálddašeaddji galgá maidái ožžon dohkkehuvvon doaibmalobi mii gáibiduvvo jus galgá doaimmahit boazodoalu olggobealde sámi boazoguohtunguovllu boazodoallolága § 8 vuosttaš lađđasa mielde.

## **Bustávva b: Orohatplána**

### **Orohagaide**

Orohatplána galgá leat mearriduvvon orohatstivrras ja duođaštuvvon jahkečoahkkinprotokollas.

Orohatplána galgá deavdit buot eavttuid mat leat § 62 boazodoallolágas. Jus boazodoallolága § 62 eavttut eai leat devdojuvvon, de ii leat orohagas dohkkehuvvon orohatplána. Dakkár oktavuodain ii leat orohakkii vuoigaduvvon doarjja. Orohagat mat leat mearridan orohatplána ovdal suoidnemánu 1. beaivvi 2025 fertejit dušše deavdit eavttuid ovddit boazodoallolágas. Buot plánat galget leat ođđa boazodoallolága mielde ráhkaduvvon jagi 2028 rádjái.

Viidasit lea eaktun oažžut doarjaga ahte mearriduvvon orohatplána lea ođasmahttojuvvon maŋemus njealji jagi siste ja ahte lea sáddejuvvon stáhtahálldašeaddjái.

## **Bustávva c: Boazodoalloplána**

### **Boazoservviide**

Boazosearvvit galget mearridit «boazodoalloplána», man sisdoallu lea measta seamma lágan go orohagaid orohatplánat, geahča boazodoallolága § 62.

Dohkkeheapmi dakkár boazodoalloplánas galgá geavvat dakkár vugiin mii oktiivástida oasuslága gáibádusaiguin dahje ovtastussearvvi lágain ovtastusservviid váste (oasussearvi). Stivra dat galgá dohkkehit plánaid mat leat dárbbaslaččat fitnodakkii/ovtastussearvá, geahča oasuslága § 6-12 ja ovtastussearvelága § 76. Njuolggadusa mielde ii leat gáibádus ahte plána galgá leat dohkkehuvvon.

## **Bustávva d: Revisordohkkehuvvon rehketoallu**

Lea eaktun ahte stáhtahálldašeaddjái lea sáddejuvvon orohaga/boazosearvvi revisordohkkehuvvon rehketoalu ovddit jagi ovddas. «Ovddit jagiin» oaivvilduvvo kaleanddarjahki ovdal go doarjjaohcamuš sáddejuvvo.

### **Orohagaide**

Bustávva d mielde ferte revisor dohkkehan rehketoalu. Njuolggadusa fuomášumiiguin čujuhuvvo boazodoallodoallolága § 50, vrd. § 48 ja láhka revisuvvna ja rehketoalliid birra (revisorláhka) § 2-1.

Revisorlága § 2-1 mielde galget rehketoallogeadnegáhtton olbmot rehketoallolága § 1-2 vuodul oažžut rehketoalu dohkkehuvvot rehketoalli dahje stáhtadohkkehuvvon rehketoalli bokte dakkár vugiin mii oktiivástida § 2-2 (rehketoallogáibádus) go eai leat eará mearrádusat mat leat mearriduvvon lága bokte dahje vuodđuduvvon lágas.

Orohagat leat dábálaččat registrerejuvvon «eará juridihkalaš olmmožin» Brønnøysundregistaris. Dábálaš dietnasat leat doarjagat dan njuolggadusa mielde, jahkasaš doarjagat maid siidaoasit leat geatnegahtton máksit boazodoallolága § 46 vuosttaš lađđasa mielde ja vejolaš buhtadusat dahje eará doarjagat.

Boazodoallolága § 48 mielde galgá jahkečoahkkin válljet rehketoalli gii lea registrerejuvvon dahje stáhtadohkkehuvvon revisorlága mielde. Stáhtahálldašeaddji sáhtta dohkkehit revisorlávdegotti mas leat guokte dahje golbma mielláhtu main lea jienastanvuoigatvuohta orohagas olgguldas rehketoalli ovdii, vrd. boazodoallolága § 48 nuppi lađđasa. Dat mearkkaša ahte orohaga rehketoallu álo galgá reviderejuvvot, ja dan dihte gáibiduvvo ahte rehketoallu lea dohkkehuvvon revisora bokte, dahje ahte válljejuvvon mielláhtut dohkkehit rehketoalu.

Orohat lea geatnegahtton ráhkadit jahkereketdoalu, mii sáddejuvvo revisorii ovdal njukčamánu 15. beaivvi, vrd. njuolggadus boazodoallofoanddaid rehketoallu ja orohagaid rehketoallu § 8 ja § 9. Seamma njuolggadusas § 14 boahká ovdan ahte juohke rehketoallogeatnegahtton orohat ja foanda leat geatnegahtton revišuvdnii, ja ahte revišuvdna galgá dahkkot registrerejuvvon revisora dahje stáhtadohkkehuvvon revisora bokte. Njuolggadusa § 14 vuosttilda boazodoallolága § 48 nuppi laððasa, mas boahká ovdan ahte stáhtahálldašeaddji sáhtá dohkkehit revisorlávdegotti mas leat guokte dahje golbma mielláhtu main lea jienastanvuoigatvuohta orohagas olgguldas rehketoalli ovdii.

Go lea vuostálasvuohta, de lea 2007 boazodoalloláhka dan maid čuovvut galgá ovdal njuolggadusaid. Dan dihte ii gáibiduvvo ahte revišuvdna dahkko registrerejuvvon revisora dahje stáhtadohkkehuvvon revisora bokte go stáhtahálldašeaddji lea dohkkehan revišuvdnalávdegotti orohaga jienasteddjiid gaskkas.

Boazodoallolága mielde gáibiduvvo ahte orohat doallá jahkečoahkkima ovdal geassemánu loahpa juohke jagi, ja jahkereketdoallu galgá mearriduvvot jahkečoahkkimis, geahča boazodoallolága § 49 nuppi laððasa, vrd. § 50 vuosttaš laððasa nr. 1.

Jahkereketdoallu galgá sáddejuvvot stáhtahálldašeaddjái ovdal suoidnemánu 15. beaivvi Áigemearri lea seamma go orohagaid ja boazoservviid doarjaga ohcanáigemearri. Jus jahkereketdoallu ii leat sáddejuvvon áigemearrái, de orohat ii deavdde eavttu § 2-1 bustávva a ahte orohat lea «doaimmas». Stáhtahálldašeaddji sáhtá dispenseret ohcanáigemearis erenoamáš oktavuodain, geahča kommentáraid § 2-5 nubbi laðas.

### Boazoservviide

Boazodoallolága § 6, mii lea orohagaid ja siiddaid birra, ii fátmmas boazoservviid. Dan dihte ii guoskka boazodoalloláhka § 48 boazoservviide. Revišuvdnageatnegasvuohta boazoservviide árvvoštallojuvvo revisorlága mielde.

Revisorlága § 2-1 mielde galget rehketoallogeadnegahtton olbmot rehketoallolága § 1-2 vuodul oázžut rehketoalu dohkkehuvvot rehketoalli dahje stáhtadohkkehuvvon rehketoalli bokte dakkár vugiin mii oktiivástida § 2-2 (rehketoallogáibádus) go eai leat eará mearrádusat mat leat mearriduvvon lága bokte dahje vuodđuduvvon lágas.

Boazosearvvit leat registrerejuvvon oasussearvin (OS), ja ovddasvástideaddji searvin (ANS) dahje ovddasvástideaddji searvin main lea juhkkujuvvon ovddasvástádus (DA). Dakkár servviin lea dábálaččat álo rehketoallogeatnegasvuohta ja revišuvdnageatnegasvuohta, muhto leat muhtun spiehkastagat.

Juohke oktavuodas ferte árvvoštallat lea go boazosearvi revišuvdnageatnegasvuodamearrádusaid vuolde. Árvvoštallama dahká revisorlága vuodul. Jus boazosearvi ii leat revišuvdnageatnegahtton, de eai sáhte boazodoalloeiseváldit gáibidit ahte dieđut dan njuolggadusa § 1-2 bustávva c duodaštuvvojit revisora bokte. Boazoservviide eai biddjo eambbo gáibádusat njuolggadusa bokte go dat mii boahká ovdan lágas (das: revišuvdnaláhka).

Gáibiduvvo liikka ahte boazosearvvit sáddejit jahkereketdoalu ovddit jagi ovddas.

### Bustávva e: Raporterenskovvi

Raporterenskovvi gávdno Eanandoallodirektoráhtta neahttasiiddus.

Galgá reporteret DBS-oastimiid, buozalmasvuoda ja áhpehisvuoda veahkkeortnega, luopmo- ja ástoáigge veahkkeortnega, ja gearggusvuodaortnega.

Bustávva f dárkkuha ahte eaktu reporterema birra guoská dušše daidda orohagaide/boazoservviide mat leat ožžon doarjaga dan njuolggadusa mielde maŋemus boazodoallojagi ovddas. Rievdadus lea dahkkon dainna ulbmiliin ahte orohagat maid ortnet ii leat fátmastan ovdal galget sáhttit deavdit eavttu.

Ohcci lea geatnegahtton reporteret orohatdoarjaga geavaheami stáhtahálddašeaddjái áigemeari sisa. Váilevaš reporteren sáhtta dagahit ahte diimmá doarjja gáibiduvvo ruovttoluotta máksojuvvot dahje ahte gessojuvvo boahte jagi doarjagis.

### Bustávva f: Gearggusvuodaplána

Orohat ja boazosearvi ferte mearridan gearggusvuodaplána mii čájeha mo orohat ja boazosearvi galgá gieđahallat vejolaš kriisa.

#### **Ođđa lađas dispensašuvnna birra**

Erenoamáš oktavuodain sáhtta Eanandoallodirektoráhtta dispenseret gáibádusas revisordohkkehuvvon rehketoalu birra jus revisor ii sáhte dohkkehit rehketoalu dan dihte go váilot stivrra vuolláičállagat. Dispensašuvdna sáhtta addojuvvot vai orohat ii masse doarjavuoigatvuoda. Gáibiduvvojit buorit ákkat ovdal dispensašuvdna sáhtta addojuvvot. Siskkáldas stivrrat leat geatnegahtton álggos gieđahallat dilálašvuoda siskkáldasat ovdal dispensašuvdna sáhtta addojuvvot.

## **§ 2-2. Orohatdoarjaga máksomearit**

Doarjja boazodoalloorohagaide, ja maiddá Trollheimenii, juolluduvvo fásta vuodđomáksun gitta 264 000 ruvnno guđege orohahkii. Go orohagat časkojuvvojit oktii, de oažžu orohat vuodđomávssu vuosttaš guokte jagi nu galli orohaga ovddas go leat oktiičaskojuvvon.

Doarjja dahká

- a. gitta 385 500 ruvnno Nuorta-Finnmárkku boazoguohtunguovllu 17. orohahkii
- b. gitta 457 000 ruvnno Nuorta-Finnmárkku boazoguohtunguovllu 16. orohahkii
- c. gitta 457 000 ruvnno Oarje-Finnmárkku boazoguohtunguovllu orohagaide 30A, 30B ja 30C,
- d. gitta 148 500 ruvnno Femund orohahkii Lulli-Trøndelága/Hedmárkku boazoguohtunguovllus, ja
- e. gitta 251 000 ruvnno guđege boazosearvái.

Lassin juolluduvvo gitta 22 500 ruvnno guđege siidaoassi nammii. Nuorta-Finnmárkku boazoguohtunguovllu orohat 16 siidaosiid dáfus lea doarjja gitta 34 000 ruvnno. Dát variábel doarjja juolluduvvo dušše nu galli siidaoasi nammii go maidda lea juolluduvvon buvttadanvuoitu unnimusat ovttá golmma maŋemus doaibmajagis. Variábel doarjja ii gusto orohagaide 17, 30A, 30B, 30C, ja Femund.

Orohagat mat leat mearridan siidajuogu jahkečoahkkinnmearrádusa bokte sáhttet juogadit doarjaga daid iešguđetge siiddaid gaska.

**Gáldu:** [Forskrift om tilskudd til reinbeitedistrikter og reinlag](#) (Lovdata)

## **Kommentárat mearrádussii**

Orohatdoarjja lea juhkkjuuvvon čuovvovaš osiide:

- vuodđosubmi, man juohke orohat ja boazosearvi oažžu jus devdet § 2-1 eavttuid, ja
- variábel doarjja juohke siidaoasi nammii (orohagaide), jus siidaoassi deavdá mearriduvvon eavttuid.

Vuodđosubmi lea mearriduvvon § 2-2 vuosttaš ja nuppi lađđasis, ja variábel doarjja lea mearriduvvon goalmát lađđasis. Variábel doarjja Trollheimen sijte nammii lea mearriduvvon sierra § 2-4.

### **Vuosttaš lađas: Vuodđosubmi**

Vuodđosubmi galgá láhčit dili orohaga bargui dálkkádatheiveheapmái ja areálabargguide.

### **Nubbi lađas: Spiehkastagat**

Mearrádus lea spiehkastat vuosttaš lađđasa váldonjuolggadusas. Dat mearkkaša ahte orohagat mat leat namuhuvvon nuppi lađđasis ožžot dan supmi mii boahá ovdan mearrádusas, eai gea oaččo dan supmi mii lea vuosttaš lađđasis váldonjuolggadus.

Listtu orohagaid badjel mat ožžot dakkár doarjaga lea dievaslaš. Dat mearkkaša maid ahte vejolašvuhta lasihit supmi go časká oktii orohagaid § 2-2 vuosttaš lađđasa mielde, dušše guoská orohagaide mat ožžot vuodđosupmi vuosttaš lađđasa mielde. Dat vuodđuduvvo maid sátnádeamis vuosttaš lađđasis gos čuožžu ahte mearrádus mearrida «vuodđosupmi». Doarjja boazoservviide lea dievaslaš čat mearriduvvon nuppi lađđasis. Mearrádusa vuosttaš lađas ii fátmmas boazoservviid ge.

### **Goalmát lađas: Variábel doarjja**

Goalmát lađas mearrida variábel doarjaga, man orohat oažžu juohke siidaoasi namas jus siidaoassi lea ožžon buvttadanvuoittu ovtta mañemus golmma mañemus boazodoallojagiid ovddas. «Golmma mañemus boazodoallojagiin» oaivvilduvvo golbma boazodoallojagi ovdal go ohcá doarjaga. Dat mearkkaša ahte orohat mii ohcá doarjaga boazodoallojagi 2025/2026 ovddas, vuodđuda árvvoštallama boazodoallojagiide 2022/2023, 2023/2024 ja 2024/2025 ovddas.

Doarjja § 2-2 goalmát lađđasa mielde ii gusto oktasašorohagaide mat leat namuhuvvon mearrádusas. Namuhuvvon orohagat leat buot dálveorohagat, ja orohagat mat leat dain dálveguohtumiin gullet buohkat sierra geasseguohtumiidda. Orohagat mat geavahit daid dálveguohtumiid, ožžot variábel doarjaga geassesiiddaid bokte.

Boazosearvvit leat ásahuvvon eará láhkái go sámi boazodoallu, ja dan dihte boazosearvvit eai oaččo variábel doarjaga. Dat lea maid dan dihte go sátnádeapmi dadjá «juohke siidaoasi namas», go boazoservviin eai leat siidaoasit.

### Njealját lađas: Siskkáldas juohkin

Njealját lađas lea dušše orohagaide. Dan mearrádusa mielde sáhttet orohagat juohkit orohatdoarjaga iešguđetge siidii jahkečoahkkinmearrádusa vuodul. Dakkár juohkima sáhtta dahkat dušše manjel go orohatdoarjja lea máksojuvvon orohaga bänkointui. Mearrádusa ii galgga ipmirdit dainna lágiin ahte Eanandoallodirektoráhtta máksá doarjaga ovttaskas siiddaide.

## § 2-3. Orohatdoarjaga geavaheapmi

Doarjja galgá addit vuodu doaibmabijuide mat heivejit oktii njuolggadusa ulbmiliin, gč. § 1-1, dása gullá:

- a. hálddašeapmi ja resursahálddašeapmi
- b. várren roassogearggusvuodafondii
- c. oastit rusttegiid heahtebiebmamii nu go boahtá ovdal orohaga gearggusvuodaplánas,
- d. dearvvašvuoda-, biras- ja sihkarvuodabargu
- e. bargoveahkki buozanvuoda oktavuodas, álbmotoaju oppalaš ortnegiid lassin
- f. bargoveahkki luomu ja astoáiggi oktavuodas
- g. oktasaš investeremat rusttegiidda mat sáhttet dustet dálkkádatheivehemiid.

Gáldu: [Forskrift om tilskudd til reinbeitedistrikter og reinlag](#) (Lovdata)

### Kommentárat mearrádussii

Doarjavuoigaduvvon doaibmabijuid listtu ii leat dievaslaš. Doaibmabijut maid orohat- ja boazosearvedoarjja gokčá galget oktiivástidit doarjjaortnega ulbmiliin, geahča § 1-1.

## § 2-4. Sierra doarjja Trollheimenii

Trollheimenii addojuvvo doarjja sierragoluide gitta 15 000 ruvnno rádjái juohke siidaoasinammii masa lea juolluduvvon buvttadanvuoitu unnimusat ovttá dan golmma manemus jagis. Mearriduvvon rámmaeavttuid vuodul máksojuvvo gitta 200 000 ruvdnosaš erenoamášdoarjja guhtiige dan viđa siidaoasis Trollheimenis. Jus rámmaeavttut rievdaduvvojit, de heaittihuvvo doarjja.

Gáldu: [Forskrift om tilskudd til reinbeitedistrikter og reinlag](#) (Lovdata)

### Kommentárat mearrádussii

Vuodđosupmi § 2-2 vuosttaš lađđasa lassin sáhtta Trollheimen sijte oažžut variábel doarjaga sierra mearrádusa mielde § 2-4 mearrádusas. Trollheimen sijte boazodoallu lea mearriduvvon sierra lágas, trollheimilágas juovlamánu 21. beaivvi 1984 nr. 101. Trollheimena boazodoallu lea sámi boazodoallu mii lea olggobealde dan mii lea sámi boazoguohtunguovlu, vrd. boazodoalloláhka § 8. Vuodđoeaiggádiin leat muhtun muddui dahkkon láigošiehtadusat, ja muhtun muddui leat dárbbaslaš vuoigatvuodát boazodollui bággolonistuvvon.

Vaikko Trollheimen formálalaččat lea sijte (lullisámegillii siida) iige orohat, de lea Trollheimena doarjjamearrádus biddjon dán njuolggadusa vuollái.

Mearrádusas leat guokte iešguðetlágan doarjaga juohke siidaoasi nammii - doarjja «sierragoluide» ja «erenomášdoarjja». Eaktu oažžut doarjaga «sierragoluide» lea seamma go § 2-2 goalmát laððasa variábel doarjagis. Geahča kommentáraid namuhuvvon mearrádussii árvvoštallat variábel doarjaga eavttuid.

Lassin sáhtta juolluduvvot erenomášdoarjja juohke siidaoasi nammii «mearriduvvon rámmaeavttuid vuodul». Sátnádeapmi «mearriduvvon rámmaeavttuid vuodul» čujuha dasa ahte Trollheimena siidaosiin leat unnán bohccot, ja eai oaččo cegget ealu eastadan dihte riidduid eanandoaluin.

Jus rámmaeavttut rievdaduvvojit, de heaittihuvvo doarjja, vrd. § 2-4 manjemus čuokkis.

## § 2-5. Ohcanáigemearri

Orohatdoarjaga ohcan oktan mildosiiguin galgá leat lágiduvvon sisa ovdal suoidnemánu 15. b.

Erenomáš oktavuodain sáhtta stáhtahálddašeaddji spiehkastit ohcanáigemearis.

**Gáldu:** [Forskrift om tilskudd til reinbeitedistrikter og reinlag](#) (Lovdata)

### Kommentárat mearrádussii

#### **Vuosttaš laðas: Ohcanáigemearri**

Ohcci lea ieš ovddasvástideaddji ahte buot dárbblaš duodaštusat sáddejuvvot stáhtahálddašeaddjai áigemeari sisa. Duodaštusat mat bohtet manjel áigemeari eai leat mielde vuodus go doarjja meroštallojuvvo, jus ii leat addojuvvon dispensašuvdna. Dat sáhtta dagahit ahte doarjjaohcamuš hilgojuvvo.

#### **Nubbi laðas: Dispensašuvdna ohcanáigemearis**

**Ohcan áigemeari dispensašuvdna birra ferte dábálaččat sáddejuvvot ovdal ohcanáigemeari**  
Jus orohat/boazosearvi muhtun sivaiddihte ii sáhte sáddet ohcamuša dahje háhkat dárbblaš mildosiid ohcanáigemeari sisa, de sáhtta stáhtahálddašeaddji dispenseret ohcanáigemearis. Erenomáš oktavuodain, ovdamearkka dihte fáhkka buohccáma dihte, de sáhtta dohkkehuvvot ahte dispensašuvdnaohcamuš sáddejuvvo manjel ohcanáigemeari.

Dispensašuvdna sáhtta dušše addojuvvot «erenomáš oktavuodain». Dalle mearkkaša ahte dilálašvuohta mii lea ággan dispensašuvdnaohcamuššii galgá spiehkastit dábálaš dilálašvuoðas ja leat ohcci kontrollerat olggobealde. Ovdamearkkat sáhttet leat jápmin, fáhkka buohccán ja sullasaš.

Fuomáš ahte dispensašuvdna gusto dan jagaš orohatdoarjaga ohcanáigemearrái ja ahte dat ii gusto orohagaid raporterengeatnegasvuhtii. § 1-4.

## § 2-6. Doaibmanjuolggadusaid ráhkadeami goluid gokčan

Jus orohat ieš ii ráhkat doaibmanjuolggadusaid, de gokčojuvvojit stáhtahálddašeaddji golutdoaibmanjuolggadusaid ráhkadeapmái orohatdoarjaga rámma siskkobealde.

Gáldu: [Forskrift om tilskudd til reinbeitedistrikter og reinlag](#) (Lovdata)

### Kommentárat mearrádussii

Mearrádus geavahuvvo go stáhtahálddašeaddji geavaha resurssaid veahkehit orohaga ráhkadit doaibmanjuolggadusaid, go stáhtahálddašeaddji ii dohkket orohaga evttohus doaibmanjuolggadusaide boazodoallolága § 58 viđát lađđasa mielde.

Dušše golut mat leat «orohatdoarjaga rámma sikkobealde» sáhttet gokčojuvvot dihto boazodoallojagi sikkobealde. Dat mearkkaša ahte submi man ohcá gokčojuvvot orohatdoarjaga bokte ii goasse sáhte leat eambbo go obbalaš doarjjasubmi man orohat livčče sáhtán oažžut. Dan dihte ii sáhte geassit eret stáhtahálddašeaddji goluid dakkár vugiin ahte orohat manná «minusa beallái».

Mearrádus ii fátmmas boazoservviid, go boazodoalloláhka ii gáibit ahte boazosearvvit ráhkadit doaibmanjuolggadusaid.

## Kapihttal 3. Gearggusvuodáfoanda

### § 3-1. Doarjja gearggusvuodáfondii

Doarjja gearggusvuodáfondii juolluduvvo 45 ruvnno juohke bohcco nammii. Boazolohku mii biddjo vuodđun lea njukčamánu 31. beaivvi boazolohku, mii lea almmuhuvvon boazodoallodieđáhusas. Ii juolluduvvo doarjja eanet bohccuide go dat mii lea siidda dahje boazosearvvi mearriduvvon alimus boazolohku. Doarjja sáhtá juolluduvvot dassáži go orohaga dahje boazosearvvi gearggusvuodáfoanda lea doarvái stuoris hálddašit 90 jándora guohtunroasu, mii vástida 3 ruvnno juohke bohcco nammii jándoris. Doarjja roassogearggusvuhtii ii máksujuvvo orohagaide 17, 30A, 30B, 30C, ja Femundii.

Orohat ja boazosearvi lea geatnegas atnit gearggusvuodáfoandda sierra bánkokontos. Galgá ráhkaduvvot sierra rehketdoallu gearggusvuodáfoandda dáfus.

Gáldu: [Forskrift om tilskudd til reinbeitedistrikter og reinlag](#) (Lovdata)

### Kommentárat mearrádussii

#### Vuosttaš lađas

Gearggusvuodáfoandda doarjjasubmi mearriduvvo vuosttaš lađđasis. Doarjja lea juohke bohcco namas ja meroštallama vuodđun lea orohaga/boazosearvvi boazolohku njukčamánu 31. beaivvi Boazodoallodieđáhusas dan jagi ovddas masá ohcá doarjaga. Doarjja ráddjejuvvo lobálaš boazologu rádjái. Dan dihte ii sáhte juolluduvvot doarjja bohccuide mat leat badjel orohaga mearriduvvon boazologu. Jus orohat/boazosearvvi gearggusvuodáfoanda lea doarvái giedahallat guohtunroasu mii bistá 90 jándora, de ii galgga juolluduvvot doarjja badjel 90 jándorii. Máksomearri 3 kr. juohke bohcco nammii leat šiehtadanbealit mearridan.

#### Nubbi lađas:

Orohagain ja boazoservviin ferte leat sierra bánkokontu gearggusvuodáfondii masá lea sierra rehketdoallu. Orohagat ja boazosearvvit main ii leat sierra bánkokontu eai sáhte oažžut doarjaga

gearggusvuodafondii ovdal go leat ásahan dakkár konto. Jus ii ráhkaduvvo sierra rehketdoallu, de sáhtá máksojuvvon doarjja gáibiduvvot ruovttoluotta máksojuvvot dassáži lea njulgen dili.

## § 3-2. Gearggusvuodáfoandda geavaheapmi

Gearggusvuodáfoanda § 3-2 mielde galgá gokčat goluid § 3-3 mielde dain oktavuodain gogearggusvuodálávdegoddi lea nannen ahte lea ealátroassu.

Orohat ja boazosearvi sáhtá mearridit váldit atnui iežas gearggusvuodáfoandda, jus:

- orohatstivra dahje boazosearvi árvvoštallá ahte lea ealátroassu olles dahje osiin orohagas § 1-2 nuppi laðđasa definišuvnna mielde, ja
- lea dárbu álggahit doaibmabijuid jođánit, ja
- orohatstivra dahje boazosearvi lea dieđihan gearggusvuodálávdegoddái ahte lea dárbašlaš fitnat geahčadeame dili orohagas.

**Gáldu:** [Forskrift om tilskudd til reinbeitedistrikter og reinlag](#) (Lovdata)

## Kommentárat mearrádussii

Dat mearrádus lea § 2-2 mii lea ovddit orohat-/boazosearvedoarjjanjuolggadusas vižžojuvvon.

Mearrádus rahpá vejolašvuoda orohatstivrii mearridit ahte geavahišgohtet iežaset gearggusvuodáfoandda ovdal go gearggusvuodálávdegoddi lea cealkán ahte lea guohtunroassu. Eaktuduvvo dalle ahte stivra árvvoštallá ahte lea guohtunroassu definišuvnna mielde, ja ahte lea dárbu álggahit doaibmabijuid farggamusat, ja ahte stivra lea dieđihan gearggusvuodálávdegoddái ahte lea dárbašlaš geahčadeapmái.

Deattuhuvvo, ahte váldonjuolggadus lea geavahit orohaga gearggusvuodáfoandda manjel go gearggusvuodálávdegoddi lea cealkán ahte lea guohtunroassu, vrd. vuosttaš laðđasa. Nubbi laðas lea praktihkalaš spiehkastatmearrádus mii geavahuvvo dalle go lea dárbu álggahit doaibmabijuid johtilit, muhto sáhtá gollat áigi ovdal gearggusvuodálávdegoddi sáhtá geahčadit guovllus.

Orohatstivra ferte dahkat riskaárvvoštallama go foandda rahpá dakkár oktavuodain. Foandda rahpá orohatstivra iežas ovddasvástádusain. Jus čájehuvvo ahte gearggusvuodálávdegoddi ii cealkke ahte lea guohtunroassu guovllus, de orohatstivra lea geavahan foandda ruđaid dakkár oktavuodas go ii leat guohtunroassu ja geavahuvvon ruđat sáhttet gáibiduvvot ruovttoluotta máksojuvvot, vrd. § 3-4.

## § 3-3. Golut ja máksomearit

Gollun § 3-2 mielde rehkenastojuvvojit earret eará molssaevttolaš guohtuneatnamiid láigoheapmi, fuođđariid oastin, bargoveahki láigoheapmi fuođđariid ja olbmuid fievrredeapmi, ja bohccuid sirdin molssaevttolaš guohtunguovlluide.

Ovttaskas olbmo barggu sáhtá eanemusat buhtadit 210 ruvnnuin diimmus.

Ovttaskas olbmo fievruid geavaheami ja eará rusttegiid geavaheami gokčamii geavahuvvojit stáhta máksomearit.

Gáldu: [Forskrift om tilskudd til reinbeitedistrikter og reinlag](#) (Lovdata)

### Kommentárat mearrádussii

Golut sáhttet § 3-2 mielde leat earret eará

- fuođđariid oastin
- fuođđariid fievrredeapmi
- bohccuid sirdin molssaevttolaš guohtunguovlluide
- bargoveahki láigoheapmi mii lea dárbbášlaš eastadan dihte boazovahágiid
- olbmuid fievrredeapmi
- molssaevttolaš guohtuneatnamiid láigoheapmi

Ovttaskas olbmo barggu sáhtta eanemusat buhtadit 210 ruvnnuin diimmus. Bargodiimmuid sáhtta duođaštit diibmolisttuin.

## § 3-4. Máhcangáibádus boasttogeavaheami olis

Stáhtahálddašeaddji sáhtta gáibidit ahte visot dahje oassi geavahuvvon ruđain galget máhcahuvvot roassogearggusvuodafondii jus:

- foanda geavahuvvo § 3-2 oppalaš eavttuid vuostá, dahje
- stáhtahálddašeaddji ii dohkket foandda geavaheami raporterema § 1-4 mielde.

Gáldu: [Forskrift om tilskudd til reinbeitedistrikter og reinlag](#) (Lovdata)

### Kommentárat mearrádussii

Jus stáhtahálddašeaddji fuomáša ahte foanda geavahuvvo dakkár vugiin mii spiehkasta § 3-2 eavttuiguin, de sáhtta gáibidit ruđaid belohahkii dahje oalát máksojuvvot ruovttoluotta gearggusvuodafondii. Dat gusto maid jus stáhtahálddašeaddji ii dohkket foandda geavaheami raporterema. Raporteren galgá sáddejuvvot ovdal suoidnemánu 15. beaivvi, ja váilevaš raporteren sáhtta mielddisbuktit ahte geavahuvvon ruđat gáibiduvvojit ruovttoluotta máksojuvvot gearggusvuodafondii.

Stáhtahálddašeaddji dat árvvoštallá ja čuovvola ruovttoluottamáksima.

## Kapihttal 4. Erenoamáš doarjja gearggusvuhtii

### § 4-1. Doarjjaeavttut

Liige gearggusvuodadoarjja sáhtta juolluduvvot orohagaide ja boazoserviide, jus:

- gearggusvuodálávdegoddi lea nannen ahte guoskevaš orohagas ja boazosearvvis lea ealátroassu, ja
- leat gollan unnimusat 30 jándora dan rájes go gearggusvuodálávdegoddi nannii ahte orohagas dahje boazosearvvis lea ealátroassu.

Doarjja roassogearggusvuhtii ii máksojuvvo orohagaide 17, 30A, 30B, 30C, ja Femundii.

Doarjja galgá máksojuvvot orohaga ja boazosearvvi gearggusvuodáfondii ja galgá geavahuvvot kapihtal 3 mielde.

**Gáldu:** [Forskrift om tilskudd til reinbeitedistrikter og reinlag](#) (Lovdata)

## Kommentárat mearrádussii

### Vuosttaš lađas

Guokte eavttu fertejit leat devdojuvvon ovdal go doarjjaohcamuš sáhhtá juolluduvvot.

### Bustávva a: Gearggusvuodálávdegoddi lea cealkán ahte lea guohtunroassu

Vuosttaš eaktu lea ahte gearggusvuodálávdegoddi lea cealkán ahte lea guohtunroassu. Gearggusvuodálávdegottiid árvvoštallama vuodđun galgá leat guohtunroasu definišuvdna, geahča § 1-2 kommentáraid. Guohtunroasu álgindáhton biddjo dábálaččat dan dáhtonii go orohat/boazosearvi diedihii hástaleaddji guohtuma birra ja ahte lea dárbu geahčadeapmái.

### Bustávva b: Lea gollán unnimusat 30 jándora dan rájes go celkojuvvui ahte lea guohtunroassu

Nubbi eaktu lea ahte lea gollán unnimusat 30 jándora dan rájes go gearggusvuodálávdegoddi celkkii ahte lea guohtunroassu. Orohat dahje boazosearvi ferte ieš ruhtadit dárbblaš goluid biebmamii jna. daid vuosttaš 30 jándora guohtunroasus. Dat gusto maidái go eai leat doarvái ruđat gearggusvuodáfoanddas gokčat dárbblaš goluid 30 jándora ovddas. Go leat gollán unnimusat 30 jándora, de sáhhtá ohcat erenoamášdoarjaga gearggusvuhtii.

### Nubbi lađas:

Orohagat 17, 30A, 30B ja 30C eai sáhte ohcat erenoamáš doarjaga gearggusvuhtii. Duogáš dan mearrádussii lea ahte orohagat leat dálveorohagat ja doarjja lea čadnon geasseorohagaide.

## § 4-2. Doarjjameroštallan

Doarjja meroštallojuvvo 4,50 ruvdnui guđege bohcco nammii jándoris, dan boazologu mielde mii gullá daidda siiddaide dahje boazoservviide gos gearggusvuodálávdegoddi lea nannen ealátroasu.

Boazolohku mii biddjo vuodđun lea njukčamánu 31. beaivvi boazolohku, mii lea almmuhuvvon boazodoallodieđáhusas. Ii juolluduvvo doarjja eanet bohccuide go dat mii lea siidda dahje boazosearvvi mearriduvvon alimus boazolohku.

Sáhhtá ohcat doarjaga 15 jándora áigodahkii dan beaivvi rájes go § 4-1 vuosttaš lađđasa eavttut leat devdojuvvon. Jus ealátroassu bistá, de sáhhtá ohcat doarjaga ođđa 15 jándora áigodahkii.

**Gáldu:** [Forskrift om tilskudd til reinbeitedistrikter og reinlag](#) (Lovdata)

## Kommentárat mearrádussii

Gearggusvuodá erenoamášdoarjaga máksomearri lea 4,50 ruvnno juohke bohcco nammii mii gullá siidii dahje boazosearvái gos guohtunroassu lea celkojuvvon. Boazolohku mii biddjo vuodđun lea

njukčamánu 31. beaivvi boazolohku, mii lea almmuhuvvon boazodoallodieđáhusas.

Ii leat dárbblaš raporteret juohke áigodaga maŋgel. Siida/boazosearvi sáhtá čohkket buot áigodagaide goluid geavaheami raporterema maŋemus boazodoallojagi ovddas suoidnemánu 15. beaivvi rádjái.

### § 4-3. Doarjja johtit bohccuiguin dálveorohagas geasseorohahkii

Orohat sáhtá ohcat doarjaga johtit bohccuiguin dálveorohagas geasseorohahkii dan beaivvi rájes go § 4-1 vuosttaš lađđasa eavttut leat devdojuvvon. Johtindoarjja addojuvvo dušše johtimiidda mat leat čađahuvvon ovdal miessemánu 10. beaivvi.

Johtindoarjja dahká 0,18 ruvno bohcco nammii guđege kilomehteris. Ii juolluduvvo doarjja eanet bohccuide go dat mii lea siidda mearriduvvon alimus boazolohku.

Fievrrideaddjit ja fievrrut mat geavahuvvojit johtimiidda galget leat almmolaččat dohkkehuvvon ealli bohccuid fievrrideapmái.

Johtindoarjjaohcan sáddejuvvo stáhtahálldašeaddjái ovdal miessemánu 31. beaivvi. Ohcamis galgá duođastuvvot ahte johtin lea čađahuvvon, galle bohcco leat sirdojuvvon ja galle kilomehtera. Duođastusat das ahte fievrrideaddjis leat dárbblaš dohkkeheami fievrridit ealli bohccuid galget biddojuvvot ohcama mielddusin.

Gáldu: [Forskrift om tilskudd til reinbeitedistrikter og reinlag](#) (Lovdata)

### Kommentárat mearrádussii

Go gearggusvuodálávdegoddi lea cealkán ahte lea guohtunroassu, de lea vejolaš ohcat doarjaga sirdit bohccuid orohaga dálveguohtuneatnamiin geasseguohtuneatniidda. Doarjja sáhtá dušše juolluduvvot sirdimii mii dáhpuhuvvá ovdal miessemánu 10. beaivvi. Dan doarjaga vuodđun lea ahte bohccuin galgá leat vejolaš lunddolaš guohtuma bokte háhkat biepmu, jus geasseguohtuneatnamat leat buorebut go dálveguohtuneatnamat.

Johtindoarjja dahká 0,18 ruvno bohcco nammii guđege kilomehteris. Ii juolluduvvo doarjja eanet bohccuide go dat mii lea siidda mearriduvvon alimus boazolohku.

Gáibiduvvo ahte sihke fievrrideaddji ja fievrrus leat dárbblaš dohkkeheami fievrridit bohccuid. Almmolaš dohkkeheami leat das ellidčálgonjuolggadusat ja johtolatnjuolggadusat. Jus geavaha fievrrideaddji geas eai leat dohkkeheami, de ii sáhte juolluduvvot doarjja fievrrideapmái. Eanet dieđuid boazofievrrideami dohkkehemiid birra gávdnojit biebmearvvašvuodabearráigeahču neahtasiiddus.

Buot ohcamušat doarjaga birra fievrridit bohccuid dálveguohtuneatnamiin geasseguohtuneatniidda ferte sáddejuvvot mildosiiguin stáhtahálldašeaddjái maŋemusat miessemánu 31. beaivvi. Ohcanáigemearis ii sáhte spiehkastit. Ohcamušas ferte duođastit ahte:

- sirdin lea dahkkon (fievrrideaddji sáhtá duođastit dan fievrridanbáhpriin)
- bohccuid submi mat leat fievrriduvvon ja man galle kilomehtera leat fievrriduvvon (fievrrideaddji sáhtá duođastit dan fievrridanbáhpriin)

- fievrredeaddjis leat dárbbaslaš dohkkeheamit ealli bohccuid fievrredeapmái (duođaštuvvo Biebmodearvvašvuodabearráigeahču duođaštusain)

#### **§ 4-4. Iežasoassi go fievrreda fuođđariid helikopteriin**

Šiehtadanbealit sáhttet mearridit geavahit gearggusvuodáfoandda Boazodoalu ovdánahttininfoandda vuolde gokčat goluid helikopterii gearggusvuodálávdegottiid geahčademiide ja fuođđariid fievrredeapmái go lea guohtunroassu.

Jus gearggusvuodáfoanda geavahuvvo gokčat goluid fuođđariid fievrredeapmái helikopteriin, de lea orohagain iežasoassi man ferte máksit juohke fuođđarseahka ovddas 1600 ruvnno.

Gáldu: [Forskrift om tilskudd til reinbeitedistrikter og reinlag](#) (Lovdata)

#### **Kommentárat mearrádussii**

Eai leat kommentárat.

### **Kapihttal 5. Fápmuiboahhtin**

#### **§ 5-1. Fápmuiboahhtin**

Dát njuolggadus boahhtá fápmui dakkaviđe. Seammás heaittihuvvo njuolggadus geassemánu 26. b. 2018 nr. 1031 doarjaga birra orohagaide ja boazoservviide ja njuolggadus b. guovvamánu 4. b. 2022 nr. 165 erenoamáš doarjaga birra roassogearggusvuhtii.

Gáldu: [Forskrift om tilskudd til reinbeitedistrikter og reinlag](#) (Lovdata)

#### **Kommentárat mearrádussii**

Eai leat kommentárat.